



Bentiaraq Ottosen
Atassut

UKA 2023/155
9. november 2023

Sulisinnaagaluarlutik sulinngitsut pisortaniit pisartagaqassagunik sulinnginnerup nalaani inuiaqatigiinnut ikiuuttussatut pisussaaffilersinnaanerigut apeqquteqaat aallaavigalugu oqallisissiassatut siunnersuut.

(Inatsisartuni ilaasortaq Aqqalu C. Jerimiassen, Atassut)

Nunatsinni inuit sulisinnaagaluarlutik suliffeqanngitsut pisortaniit pisartagaqarnerminni inuiaqatigiit akornanni ikiuuttussatut pisussaaffilerneqarnissaat pingaaruteqarpoq, pissutigalugu sulisunngorsaaqinnissamut periarfissaqartitsissammata.

Oqartuarterpugut assaat pisinnaasut sulisariaqarput, tassa taanna oqaaseq isumaqarpunga toqqammavigisariaqaripput. Inuiaqatigiinnut eqeersaasariaqarput, ingammik inuusuttortatsinnut. Inuusuttut taakkua eqqartorneqartut sumiiffeqanngitsut 2337-it pineqarsinnaapput, taakkua isumaqarpunga Naalakkersuisut isiginiartariaqaraat. Naalakkersuisut kaammattorpugut taakkua eqqartorneqartut nassaarineqartariaqarneri, sumiissusersineqartariaqarnerilu.

Isumaqarpunga sulisinnaagaluarlutik sulinngitsut pisortaniit pisartagaqassappata aamma akisussaaffimmik tiguisariaqartut, nalunngilarput nammineerluta akisussaaffimmik tiguisimanngikkutta naammassinnissinnaanngilagut. Taamaattumik sulisinnaagaluarlutik pisortaniit pisartagaqartut taakkua aamma eqeersarneqartariaqalersut, naammassinnissinnaasumik iliuuseqartoqarneratigut.

Inuusuttut 18-inik ukioqalersinnagit pisussaaffilertariaqarput sakkutuujususaatitaanikkut periarfissat atorineqartariaqartut, uani pineqarpoq sulisunngorsaanikkut periarfissat taakkartorneqarsinnaasut. Soorlu ilinniartitaanikkut periarfissat eqqarsaatigineqarsinnaasut, sillimaniarnikkut sulisunngorsinnaallutik allaallumi qaffasinnerusumut ilinniartissinnaanngussagatsigit. Uani pineqanngilaq sakkutuujususaatitaaneq tassaasoq sorsukkiartussa, tassaaginnarpoq akisussaassusilimmik inuusuttup ingerlariaqqinnissaanut periarfissat aqquataasinnaasut atorineqarnerat.

Tamakkua periarfissat atorluarneqarsinnaapput, oqarutta assaat pisinnaasut sulisariaqartut. Isumaqarpunga orniginartunngortitsissagutta una siunertaq apeqquserneqartariaqanngitsoq, pissutigalugu taamaasiorutta ingerlatitsileruttalu isumaqarpunga ajunngitsuliornerussasoq. Ilaa

misilittaasariaqaleqqavugut, imaangitsoq oqaasertai ajortuummata “sakkutuujusussaatitaaneq” oqaaseq ajormat misilittaasariaqanngitsugut.

Isumaqarpunga isummersortoqarnera taamatut peqqinnartuusoq, ilaa eqqarsaatigisariaqarparput inuiaqatigiit uani kivinneqarnissaat.

Taamatut oqaaseqarluta oqallinnissamik siunnersuummut oqalliseqataanerput qujasutigaarput.